

■ COLUMNA

Davart il Chistinotbet – u glatsch permanent

BENEDETTO VIGNE

Dacurt ha Chasper Pult tractà en sia famusa e grondiusa rubrica radiofonica «Da num e da pum» il num Chistinotbet, il toponim da la tauna verticala che giascha al pe dal piz Toissa, sin il territori da mia vischnanca quasi-nativa da Salouf. Ed er gia mes cusrin, ex-redactor da la Pagina da Surmeir Peder Antona Baltermia, aveva explorà en in artitgel da la stad passada il num plitost bizar da quest lieu misterius. Chistinotbet u Chistinotbet, tut tenor famiglia. En quest connex m'è vegnida endament ina declaraziun en chaussa che omadus n'han betg menziunà en lur exploraziun, ina declaraziun ch'jau aveva gì tschiffà si durant mi'adolescenza.

Igl è ina anecdota cun trantertuns religios, naschida en in temp nua ch'ins fascheva anc processions sin mintga crest, nua ch'ins celebrava mintga mender sontg e venerava Maria en tschintg divers stadis d'agregaziun. In' anecdota naschida er en in intschess betg lunsch davent dal sontg lieu da Ziteil, il flatg autalpin, nua che la Maria menziunada era cumparida l'onn 1580 al pastur Dietegen, admo-



nind il pievel putgant da Surses da far penetienza e construir en quel lieu da l'appariziun ina baselgetta da pelegrinadi. Betg lunsch davent da l'ominusa tauna verticala entaup'ins l'altarin da la Cruschetta, ina pausa bainvegnida sin la procession stentusa vers il sanctuari, er quai in regord d'in'admoniziun severa da Nossadunna.

Ma basta, laschain las reminiscenzas da vegls rituals e turnain tar la tauna. Giu enten las cavernas abissalas da questa tauna chatt'ins glatsch, e quai, causa la frestgezza, er da stad. Probabel er anc ozendi – cas che la midada climatica n'è betg arrivada fin là giu. Glatsch permanent. La legenda raquinta ch'ils umens da Surses vegnivan pli baud mintgamai la stad a stgavar or blocca da quest glatsch, ch'els duvravan alura per padimar las pai-

nas da grev malsauns, puntgas, tuberculosas u sappia Dieu tge pestilenzas. La grazia da questa miracla haja purtà al lieu il num Christi Notbett, damai quasi il letg da las painas da Cristus, u ditg metaforicain il dun da Cristus per ils letgs da malsogna. Il «r» è insacura i a perder. Forsa er be l'invenziun d'in plevon zunt pietus ...

Jau na sun betg chatschader e sun perquai stà be duas u trais giadas sper la tauna dal Chistinotbet. Da rampignar giuaden n'haja betg ristgà. Ma stoss dir che la cuntrada è detg impressiunanta, ina pitschna terrassa selvadia, cuverta da crappuns crudads dal Toissa, surcreschids da barbacrap e circumdads da zundrina struptgada – ina cuntrada che va bain a prà cun il num ch'ella porta: La Patschanga, quel bel num che fa rima cun la tanga (surmiran per tauna). Dal reminent, da la Patschanga derivan ils pops e las poppas, raquintavan nossas mammas ed ondas a nus bagais. Probabel or dal Chistinotbet. Cun u senza «storchs». Legendas ans mantegnan en vita.

*Benedetto Vigne da Turitg è autor e schurnalist liber.